

但當斷絕病根爲主。不得泥安胎之說。而狐疑致誤也。故曰絕之。

妊娠惡阻屬經血閉塞臟氣不宣

巢元方曰。妊娠惡阻者。心中憤悶。頭眩。四肢懈惰。惡聞食氣。欲啖鹹酸果實。多睡少起。世言惡食。又云惡阻是也。三四月以上。不自勝舉。此由婦人本元虛羸。血氣不足。腎氣又弱。兼當風飲冷。心下有痰水。挾之。娠後經血閉塞。水漬於臟。臟氣不宣。故心煩憤悶。氣逆嘔吐。血脈不通。經絡痞澀。則四肢沉重。挾風則頭目眩。又不知患之所在。脈理和平。卽是有胎也。

妊娠惡阻屬五味不化中氣壅實

聖濟總錄曰。婦人所食穀味。化爲血氣。下爲月水。凡妊娠之初。月水乍聚。一月爲牒。二月爲胚。三月爲胎。成則男女上食於母。口如鳥。在牒胚之時。血氣未用。五味不化。中氣壅實。所以脾胃不思穀味。聞見於物。卽惡心有阻也。

妊娠惡阻屬氣血積聚內鬱攻胃

朱丹溪曰。凡孕二三月間。嘔逆不食。或心煩悶。此乃氣血積聚。以養胎元。精血內鬱。穢腐之氣上攻於胃。是以嘔逆不能納食。血既養胎。心失所榮。是以心虛煩悶。

但當斷絕病根爲主。不得泥安胎之說。而狐疑致誤也。故曰絕之。

妊娠惡阻屬經血閉塞臟氣不宣

巢元方曰。妊娠惡阻者。心中憤悶。頭眩。四肢懈惰。惡聞食氣。欲啖鹹酸果實。多睡少起。世言惡食。又云惡阻是也。三四月以上。不自勝舉。此由婦人本元虛羸。血氣不足。腎氣又弱。兼當風飲冷。心下有痰水挾之。娠後經血閉塞。水漬於臟。臟氣不宣。故心煩憤悶。氣逆嘔吐。血脈不通。經絡痞澀。則四肢沉重。挾風則頭目眩。又不知患之所在。脈理和平。卽是有胎也。

妊娠惡阻屬五味不化中氣壅實

聖濟總錄曰。婦人所食穀味。化爲血氣。下爲月水。凡妊娠之初。月水乍聚。一月爲胎。二月爲胚。三月爲胎。成則男女上食於母。口如鳥。在胎之時。血氣未用。五味不化。中氣壅實。所以脾胃不思穀味。聞見於物。卽惡心有阻也。

妊娠惡阻屬氣血積聚內鬱攻胃

朱丹溪曰。凡孕二三月間。嘔逆不食。或心煩悶。此乃氣血積聚。以養胎元。精血內鬱。穢腐之氣上攻於胃。是以嘔逆不能納食。血既養胎。心失所榮。是以心虛煩悶。

法當調血散鬱。用參朮甘草補中氣。橘紅紫蘇木香生薑散鬱氣。茯苓麥冬黃芩竹茹清熱解煩。名參橘飲。

妊娠惡阻屬胃氣虛弱中脘停痰

陳夏甫曰。妊娠惡阻病。產寶謂之子病。巢氏病源謂之惡阻。由胃氣怯弱。中脘停痰。脈息和順。但肢體沉重。頭眩。擇食。惟嗜酸鹹。甚者寒熱嘔吐。胸膈煩悶。半夏茯苓丸主之。

妊娠惡阻屬痰飲血壅停滯肝經

戴復庵曰。惡阻者。婦人有孕。惡心阻其飲食是也。胎前惡阻。見食嘔吐。喜酸物。多臥少起。俗名病兒。蓋其人宿有痰飲。血壅遏而不行。故飲隨氣上。停滯肝經。肝之味酸。則必喜啖酸物。金剋木。以辛勝之。小半夏茯苓湯。或二陳湯。

妊娠嘔吐屬於寒

金匱要略曰。妊娠吐嘔不止。乾薑人參半夏丸主之。

徐忠可曰。諸嘔吐酸皆屬於火。此言胃氣不清。暫作嘔吐也。若妊娠嘔吐不止。則因寒而吐。上出爲嘔。不止則虛矣。故以半夏治嘔。乾薑治寒。人參補虛。而以生薑

糊半夏。以下其所逆之氣。

妊娠嘔吐惡阻勿作寒治

大全曰。婦人經候不調。或不行。身無病似病。脈滑大。而六脈俱勻。是孕婦脈也。精神如故。惡聞食氣。或但嗜一物。或大吐。或時吐清水。此名惡阻。勿作寒病治之。宜服人參、白朮、甘草、香附、烏藥、丁香、生薑、橘紅、保生湯。

慎齋按。妊娠嘔吐。金匱主於寒。大全論勿作寒治。是矣。其用藥則多辛熱。何也。妊娠嘔吐。屬肝挾衝脈之火衝上。

羅太無曰。有孕婦三月嘔吐痰并飲食。每寅卯時作。作時覺少腹有氣上衝。然後膈滿而吐。此肝脈挾衝脈之火衝上也。用沉香磨水化抱龍丸。一服。膈寬。氣不上吐止。

妊娠嘔吐屬怒氣傷肝

朱丹溪曰。有妊二月嘔吐眩暈。脈之左弦而弱。此惡阻。因怒氣所激。肝氣傷。又挾胎氣上逆。參朮補之。大非所宜。以茯苓半夏湯下抑青丸。

妊娠嘔吐惡阻屬少陽之火上衝胃口

趙養葵曰。惡阻多在三箇月之時。相火化胎之候。壯火食氣。上衝胃口。食入卽嘔吐。少陰腎水既養胎。少陽之火益熾。須用清肝滋腎湯。卽六味飲加柴胡白芍。先用逍遙散止嘔。再用調經滋腎湯加杜續。嘔甚者加川連吳茱萸妙。

### 胎前惡阻嘔吐用半夏論

陳良甫曰。千金方有半夏茯苓湯。茯苓丸專治惡阻。此二方比來少有服者。以半夏能動胎。胎初結。慮其辛燥易散故也。須薑汁炒以制毒。凡惡阻非半夏不能止。是有故無殞也。

婁全善曰。大全方謂半夏動胎不用。今觀仲景用人參半夏乾薑丸。羅謙甫用半夏茯苓湯。朱丹溪用二陳加減。並治胎前惡阻痰逆嘔吐。心煩頭眩。惡食俱效。獨不知此乎。予治惡阻。用之未嘗動胎。正經云。有故無殞是也。

薛立齋曰。半夏乃健脾氣化痰滯主藥。脾胃虛弱嘔吐。或痰涎壅滯。飲食少。胎不安。必用半夏茯苓湯。倍加白朮。安胎健脾。予嘗用驗也。

### 惡阻嘔吐用藥大法

薛立齋曰。妊娠若飲食不甘。或欲嘔吐。用六君子加紫蘇枳殼。若惡阻嘔吐頭眩。

體倦。用參橘飲。未應。用六君子湯。若惡阻嘔吐不食。亦用參橘散。或飲食停滯。腹脹嘔吐。此是脾胃虛弱。不能消化。用六君子湯。不應。用平胃散。加麥苓。

慎齋按。已上一十三條。序胎前有惡阻嘔吐之證也。凡婦人妊孕。其始證先見於惡阻。而惡阻自金匱有絕之法而下。病機蓋非一端。巢元方以下。主於氣凝血聚。陳良甫以下。主於停痰積飲。若仲景金匱以寒治。太無養葵作火論。於惡阻病機。可謂詳悉。但胎前無寒。產後無熱。此常法也。故惡阻嘔吐。大抵寒者少。熱者多。總屬血壅胎元。臟氣不能宣通。停痰積飲。鬱熱壅滯。變而爲火。有熱無寒。致生諸證。故丹溪立齋論治。每以枳殼、紫蘇、蘇梗、木香、砂仁。爲降氣順氣之法。所謂胎前須順氣者。此也。

娠子煩屬君相二火

陳良甫曰。娠煩悶者。以四月受少陰君火。以養精。六月受少陽相火。以養氣。若母心驚膽虛。多有是證。

李太素曰。煩者。心中煩亂不安也。由受胎後。血熱干心。心氣不清。故人鬱悶。撩亂不寧。因娠而煩。故曰子煩。非子在腹中煩也。古云。四月受少陰君火。以養精。六

月受少陽相火以養氣。故煩。夫煩多屬火。今胎受君相之火。豈有母煩之理。况母既以二火養胎。則火瀉矣。又何煩之有。若曰母虛而煩。則當每月皆然。何獨於四月六月而虛且煩。亦不拘於四月六月也。似說不通。

### 娠娠子煩屬於熱

齊仲甫曰。娠娠煩悶有四證。有心中煩。胸中煩。有子煩。諸屬於熱。若臟虛而熱氣乘心。令人煩者。名虛煩。若積痰飲。嘔吐痰沫者。名胸中煩。或血積停飲。寒熱相搏。致胎氣不安。謂子煩。用犀角散。竹瀝湯之類。

### 娠娠子煩屬心肺虛熱痰積於胸

單養賢曰。是心肺虛熱。或痰積於胸。若三月而煩者。但熱而已。若痰飲而煩者。吐涎惡食。煩躁不安也。大凡娠娠既停痰積飲。又寒熱相搏。氣鬱不舒。或煩躁。或嘔吐涎沫。劇則胎動不安。均爲子煩也。

### 娠娠子煩屬胎元壅鬱熱氣上衝

朱丹溪曰。子煩由胎元壅鬱。熱氣上衝。以致煩悶。法當清熱疎鬱以安胎。犀角散主之。

妊娠子煩分證用藥之法

薛立齋曰。前證若因內熱。用竹葉湯。氣滯用紫蘇飲。痰滯用二陳加條芩枳殼。氣鬱用分氣飲加川芎。脾胃虛弱用六君子加紫蘇山梔。

妊娠煩躁屬熱乘心脾津液枯燥

陳良甫曰。妊娠煩躁口乾者。足太陰脾經。其氣通於口。手少陰心經。其氣通於舌。若臟腑氣虛。榮衛不和。致陰陽隔絕。熱乘心脾。津液枯燥。故心煩口燥。與子煩大同小異。宜知母丸。

妊娠煩躁口乾用藥之法

薛立齋曰。前證若胃經實火。用竹葉石膏湯。若胃經虛熱。用人參黃耆散。若胃經氣虛。用補中湯。若肺經虛熱。用紫蘇飲。若肝經火動。用加味逍遙散。若脾氣鬱結。用加味歸脾湯。若腎經火動。用加味地黃丸。

妊娠暴渴爲血凝病

大全曰。有孕婦暴渴。惟飲五味汁。名醫耿隅診其脈曰。此血欲凝。非疾也。已而果孕。然古方有血欲凝而渴飲五味之證。不可不知。

慎齋按。己上九條。序胎前有子煩。煩躁。口乾。血渴之證也。妊娠煩躁。本屬肺腎二經有火。仲景云。火入於肺則煩。入於腎則躁。胎繫於腎。腎水養其胎元。則元氣弱。不足以滋腎中之火。火上燥肺。肺受火刑。變爲煩躁。此金虧水涸之候。法當滋其化源。清金保肺。壯水滋腎爲主。良甫以君相二火論子煩。產寶以停痰積飲論子煩。未悉病機之要。若丹溪以子煩爲氣血壅聚胎元。熱氣上衝爲病。亦是大概言之耳。

### 妊娠子懸屬胎熱上衝

陳良甫曰。妊娠至四五月來。君相二火養胎。平素有熱。故胎熱氣逆。上湊心胸。脹滿痞悶。名曰子懸。法當補氣血。疎壅滯。用嚴氏紫蘇飲。加山梔條芩之類。紫蘇陳皮和氣。大腹斂氣。寬中。芎歸參芍養血補氣。甘草緩急。加生薑葱白。名產寶方。

### 妊娠子懸屬濁氣舉胎上湊

何松庵曰。本事方云。紫蘇飲治妊娠胎氣不和。懷胎近上。脹滿疼痛。名子懸。子懸者。濁氣舉胎上湊也。胎熱氣逆。心胃脹滿。此證挾氣者居多。疎氣舒鬱。非紫蘇腹皮川芎陳皮。無以流氣。非歸芍無以養血。氣血既利。而胎自降。然邪之所湊。其人

必虛。故以人參甘草補之。

妊娠子懸屬寒冷與氣相爭

陳良甫曰。妊娠心腹脹滿者。由腹內素有寒氣。致令停飲與氣相爭。故令心腹脹滿也。

妊娠子懸屬命門火衰腹寒就暖

趙養葵曰。有胎從心腹淩上者。名曰子懸。此命門火衰。胎在腹中寒冷。不得已。上就心火之溫暖。須理中湯不應。八味丸作湯。

慎齋按。已上四條。序胎前心腹脹滿。有子懸之證也。胎氣上逼心胸。正以氣血壅鬱胎元。鬱久則熱。故良甫主於胎熱氣逆。松庵主於濁氣舉胎。是以火熱立論爲當。若大全以寒氣冷飲。養葵以命門火衰論子懸證。必以人之壯弱。脈之遲數爲憑。如稟厚質壯。脈來洪數。而心腹脹滿者。此子懸之屬火熱爲病也。如脾胃素虛。脈來遲細。而心腹脹滿者。此子懸之屬虛寒爲患也。則百不失一矣。慎齋按。命門爲男子藏精。女子繫胞之所。胎孕受於命門。命門之火。卽是元氣。養胎故有日長之勢。譬如實。生於春而結於夏。夏月熱盛。則果實漸長。至秋

冬肅殺。則果實黃隕而落。胎在母腹。若命門火衰。勢必墮殞。豈有上就心火。而爲子懸之證。至云不得已三字。尤屬可嗤。若必以桂附入味丸治子懸。夫桂附爲墮胎藥。恐火未必益。而胎反可虞。明者辨之。

### 妊娠子滿屬胎中水血相搏

陳良甫曰。凡妊娠無使氣極。若心靜氣和。則胎氣安穩。若中風寒邪氣。及有觸犯。則隨邪生病。如妊娠經血壅閉。養胎。忽然虛腫。是胎中挾水。水血相搏。脾胃惡濕。主身之肌肉。濕漬氣弱。則肌肉虛。水氣流溢。故令身腫滿。然其由。或因泄瀉下痢。臟腑虛滑。耗損脾胃。或因寒熱瘧疾。煩渴引飲太過。濕漬脾胃。皆使頭面手足浮腫。然水清於胞。兒未成形。則胎多損壞。

### 妊娠子滿屬脾虛停水

齊仲甫曰。妊娠以經血養胎。或挾水氣。水血相搏。以致體腫。皆由脾胃虛。而臟腑之間。宿有停水。所挾。謂之子滿。若水停不去。浸漬其胎。則令胎壞。如脈浮。腹滿。兼喘者。胎未壞也。

### 妊娠浮腫屬脾胃氣虛經血壅閉

聖濟總錄曰。脾候肌肉。土氣和則能制水。水自傳化。無有停積。若妊娠脾胃氣虛。經血壅閉。則水飲不化。濕氣淫溢。外攻形體。內注胞胎。懷妊之始。腫滿必傷胎氣。如臨月而脚微腫。利其小便。病自愈。

妊娠子滿屬脾虛有濕清濁不分

何松庵曰。妊娠三月後。腫滿如水氣者。俗呼爲琉璃胎是也。古方一主於濕。大率脾虛者多。脾虛不運。則清濁不分。須以補脾兼分利。若夜腫日消。是血虛。宜健脾兼養血主之。

妊娠胎水屬胞中蓄水

陳良甫曰。婦人胎孕至五六個月。腹大異常。胸腹脹滿。手足面目浮腫。氣逆不安。此由胞中蓄水。名曰胎水。不早治。生子手足軟短。有疾。或胎死腹中。用千金鯉魚湯治其水。

妊娠胎水屬氣壅成濕

陳良甫曰。胎氣壅塞成濕。致身體脇腹浮腫。喘急氣促。小便澀。法當疎壅氣。行水濕。澤瀉散主之。

濟陰綱目曰。子滿在五六月以後。比子氣與子腫不同。蓋胎大則腹滿。滿則氣浮。遍身腫。邪無所挾。但一瀉氣利水則愈。

### 妊娠有水氣

金匱要略曰。妊娠有水氣。身重。小便不利。洒淅惡寒。起卽頭眩。葵子茯苓散主之。徐忠可曰。有水氣者。雖未大腫脹。經脈中之水道已不利。衛氣挾水。不能條暢。則周身之氣爲水滯。故身重。水已通調而順行。逆則小便不利矣。惡寒者。衛氣不行也。頭眩者。內有水氣。厥陽之火逆陰氣而上蒸。則所見皆眩矣。

### 妊娠浮腫脹滿分證用藥之法

薛立齋曰。前證若胸滿腹脹。小便不通。遍身浮腫。千金鯉魚湯。脾胃虛弱。佐以四君子。若面目虛浮。肢體如水氣。全生白朮散。未應。六君子湯。若脾虛濕熱。下部作腫。補中湯加茯苓。若飲食失節。嘔吐泄瀉。六君子湯。若腿足發腫。喘悶不寧。或指縫出水。天仙藤散。若脾肺氣滯。加味歸脾湯。佐加味逍遙散。

慎齋按。已上八條。序胎前腫脹有子滿之證也。子滿有水血相搏。有停水受濕。有經血壅閉。有清濁不分。總因脾土虛。不能制水所致。故立齋治法。不外健脾。

滲濕。順氣安胎爲主。若濟陰云。但一瀉氣利水則愈。此謬論也。必兼立齋用藥。乃爲求本之要。至夏甫以下三條。雖有胎水之名。其實與子滿異。名同證也。

妊娠脚腫名子氣屬衝任有血風

產孕集曰。妊娠自三月成胎後。兩足自脚面漸腫。行步艱難。以至喘悶。飲食不美。似水氣狀。脚指間有黃水出者。謂之子氣。直至分娩方消。此由婦人素有風氣。或衝任經有血風。未可妄投湯藥。亦慮將產之際。有不測之憂。故不可不治於未產之前也。

妊娠脚腫屬風寒濕冷

陳無擇曰。凡婦人宿有風寒濕冷。妊娠多脚腫。俗呼爲皺脚。

妊娠脚腫屬脾衰血化成水

陳夏甫曰。妊娠兩脚浮腫。名曰脆脚。因脾衰不能制水。血化成水所致。全生白朮散主之。

妊娠脛腫屬中氣壅鬱

朱丹溪曰。妊娠兩足脛腫至膝。甚則足指間出水。此由中氣聚養。胎元壅鬱。不得

升發法當疎鬱滯。天仙藤散主之。

### 妊娠脚腫屬脾經養胎病

何松庵曰。孕婦六七月間。兩足浮腫。足太陰脾經養胎也。脾主四肢。此時胎已墜下。故腫見於兩足。分娩後即愈。

### 妊娠脚腫不可作水治傷真氣

齊仲甫曰。妊娠脚腫。非水氣比。至八九月。脛及腿俱腫。不可以水病治之。反傷真氣。有此者必易產。因胞臟中水血俱多。不致燥胎故也。若初妊即腫者。是水氣過多。兒未成體。則胎必壞。

### 妊娠脚腫主男胎之驗

名醫錄曰。宋少主與徐文伯微行。學鍼法。文伯見一妊婦足腫。不能行。少主脈之。曰。此女形也。文伯診之。曰。此男胎也。在左則胎黑色。少主怒欲破之。文伯惻然曰。臣請針之。胎遂墮。男形而色黑。此妊娠足腫之說也。

濟陰綱目曰。子腫與子氣相類。然子氣在下體。子腫在頭面。若子滿。大都在五六月已後。比子氣與子腫不同。蓋胎大則腹滿。滿則氣遍身浮腫也。

慎齋按。已上九條。序胎前有子氣脚腫之證也。妊娠有遍身胸腹頭面四肢浮腫者。曰子滿。有止兩足脛腫。漸至腿膝者。曰子氣。子氣卽子腫也。要皆本於脾虛中氣不運。以致水穀濕熱之氣浸漬肌肉。流溢四肢。此大全以下三論爲見本之治。若產乳三因。是兼外邪論矣。

妊娠腹痛屬子臟寒

金匱要略曰。婦人懷妊六七月。脈弦發熱。其胎愈脹。腹痛惡寒者。少腹如扇。所以然者。子臟開故也。當以附子湯溫其臟。徐忠可曰。六七月胃肺養胎。而氣爲寒所滯。故胎愈脹。寒在內。腹痛惡寒。然惡寒有屬表者。此連腹痛。則知寒傷內矣。少腹如扇。陣陣作冷。若或扇之。此狀惡寒之異也。且獨在少腹。因子臟受寒不能合。故少腹獨甚。開者不斂也。子臟卽子宮。附子能入腎溫下焦。故宜附子湯溫其經。

妊娠心腹痛屬宿冷風寒

大全曰。妊娠心腹痛。或宿有冷疼。或新觸風寒。皆因臟虛而致發動也。邪正相擊。而併於氣。隨氣上下。上衝於心。則心痛。下攻於腹。則腹痛。妊娠痛。邪正二氣交攻。

於內。若不差。痛衝胞胎。必致動胎。甚則傷墮。

妊娠心腹痛屬痰飲與臟氣相搏

陳良甫曰。妊娠心腹疼痛。多是風寒濕冷痰飲。與臟氣相擊。故令腹痛。攻不已。則致胎動。

妊娠胸腹刺痛屬忿怒憂思

大全曰。妊娠四五月後。每常胸腹間氣刺滿痛。或腸鳴。以致嘔逆減食。此由忿怒憂思過度。飲食失節所致。蔡元度寵人有子。夫人怒欲逐之。遂成此病。醫官王師復處以木香散。莪朮。木香。丁香。甘草。鹽湯下。三服而愈。方約之曰。此方所言。婦人忿怒憂思過度。以致胸腹間氣刺滿痛。此言夏是。蓋婦人上有舅姑丈夫。事觸物忤。不能自決。憂思忿怒。沉鬱於中。故丹溪云。氣鬱便是火。火載胎上。榮衛不通。則胸腹間脹滿痛作矣。

慎齋按。已上四條。序胎前腹痛有風寒客邪痰飲七情。爲有餘之病也。

妊娠腹痛屬胞阻

金匱要略曰。假令妊娠腹中痛。爲胞阻。膠艾湯主之。